



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir yimyim

TAPAK 7



Nadal Barcelona Open nung asayatsü tebilemba lir

Vietnam tycoon Truong My Lan nem tasüba temerenshi agütsü



VOL. XXI ISSUE NO. 179 (ADOK 179) DIMAPUR ROGONÜ (FRIDAY) RONGCHII (APRIL) 12, 2024 ₹ 5.00

Nagaland nung Eid-ul-Fitr benjong amung

Dimapur, Rongchii/April 11 (TYO): Nagaland nung aliba Muslim nungertemi Brehostibarnü Eid-ul-Fitr benjong munga liasü. Eid-ul-Fitr sarasadem nung shilem agütsü atema nisung 9,000 shi IDGAH Sharif Dimapur nung adenshia liasü.

Iba sarasadem sentong timtem kecha makai agitetsü mechi sorkar aser police temi lenla balala nung yaritepba atema pelar, ta IDGAH indang general secretary

A.K. Tapadar-i ashi. Alima nung alirtem aser talisa India aser Nagaland nung tesunep aser tesendaktep tajung alitsü atema sarasadem, ta Tapadar-i ashi.

Tanep sarasadema iba sentong tenzük, kong Dimapur, Lahorijan, Khatkati aser Bokajan nungi nüburtem adenshia liasü. Küm shia Muslim nung tem ita junga lumiba Ramadan tembanga iba benjong ya amunger.

NDA sorkari linük tashi taitba kumdaktsüogo: PM Modi

Rishikesh, Rongchii/April 11 (Agencies): Centre nung aliba NDA sorkari tesüiba küm ter tsungta linük kanga agi tashi taitba kumdaktsüogo, ta Ato Kilonser Narendra Modi-i ashi.

Rishikesh nung election nübuyim ka nung jembidang, linük nung tashi mait sorkar kodang lidir idangji tsükchiri tajangzük bushir aser kiralongraba tera yangshia aor, ta Modi-i ashi.

Ozü sorkari sepaitem asoshi One Rank One Pension scheme mapa kuma inyaker aser sepa

nem India nung yangluba bullet proof jackets tem agütsüogo aser iba yongji parnok takum kumzük, ta ato kilonseri ashi.

Tanübo modern rifles nungi fighter planes aser aircraft carrier tem linük nung dang yanglur, ta ashi.

BJP sorkar kübok arütsü nung aliba yimtsungtem arsanga renloksüogo aser Gangotri, Yamunotri, Badrinath aser Kedarnath sendaktepsü atema highway kilometre 900 yangluogo, ta PM Modi-isa ashi.

Congress-i nisung lakh 30 nem sorkar mapa agütsütsü: Rahul Gandhi

Anupgarh, Rongchii/April 11 (Agencies): Linük nung tebilemsü tulu ana lir, aser aji unemployment aser osettsüset nung jenjang atuba ya lir, ta taoba Congress tir Rahul Gandhi-i ashi.

Rajasthan kübok Anupgarh nung Brehostibarnü lokti senden ka nung jembidang, unemployment aser osettsüset nung jenjang atuba kisung masü saka danga tebilemsü nunga temulung agütsütsü, ta Gandhi-i ashi.

Linük nung nütsung yongsük shilem 90 dak tema backward class, tribals, Dalits, minorities aser maka maitertem lir, ajisüaka India nung company tulutiba 200 kibur aser ketdangsur ya item backward classes nungi masü, ta pai ashi.

Linük nung sorkar mapa nung post tazung lakh 30 lir, aser Centre nung Congress-i sorkar kumtetra, nisung lakh 30 nem sorkar mapa agütsütsü aser sorkar aser PSUs nung contractual system shibangtsü, ta pai ashi.

Agniveer Scheme aija jembidang, Congress sorkar arura iba scheme ya agientsü, ta pai ashi.

Linük nung caste census alitsü nüngdaker, kechiaser shirnok ket nung India indang rongsen kwi ali aji metetsü tim, ta Rahul Gandhi-i ashi.

Linük indang rongsen ya senkar taka-taiter ishika ket nung lir aser iba inyakyim ya samatsüsüla, ta paisa ashi.

Japan nungi ketdangsurtemi Tseminyu semdang

Kohima, Rongchii/April 11 (TYO): Ministry of Foreign Affairs, Japan nungi ketdangsurtem aser Japan International Cooperation Agency (JICA) Mission Members temi April 10, 2024 nü Tseminyu village nung aliba Forestry Intervention Model Area semdanga liasü.

Parnok agizükba sentong nung jembidang, yimdaklir temi iba project inyakba nung yaritepba atema Director of Country Assistance Planning Division II, Tokita Yuji-i pelaba lemsatepa liasü.

Tarutsü nung iba project ulushia tajungba nung inyaktüsü

imlar, ta pai ashi. Iba project yimdaklir temi pela agizükba atema Senior Representative, JICA Wakamatsu Eiji-i pelaba lemsatepa liasü aser iba project yagi Tseminyu village aser region nung yimchiyimjung aliba nung yaritsü imlar, ta ashi.

Kasa sentong nung Project Director, Nagaland Forest Management Project, Temjenyabang-i Tseminyu village nung alirtem dang maneni department den teka amteper iba project ulushitsü aser lipajen dang masü saka pei yimtsung indang libaliru aser rongsenketzung tajungba kumdaktsütsü ayongzükba liasü.

Naga Hoho-i telungjem aser akangjungshiteptsü ayongzük

Dimapur, Rongchii/April 11 (TYO): Naga Hoho-i Naga nung dang mangatettep alibatem yutsür tesunep aser telungjem agizüktsü aser kati ka akumtsüboa angatetteptsü ayongzük.

Tanü nüburtem teraksa tia nung kati ka dak tamang makaba aser temulung melempeba ajanga kodanga tajungleni marutsü. Naga kin balala tsungta tebilemba, takhangba aser ken o balala ya yimya tajunglen nungi jembishinü aser angatetteptsü nüngdaker, ta ashi.

Yimjunglen nungi dang asenoki mangatettep alibatem angatetteptsü aser lenjemi arua tesunep aliba society ka yangertetsü, ta Naga Hoho sangdong ajanga ashi.

Kin balala tesendaktep tajung nung alitsü asoshi Naga Hoho-i tangatettep adoktsü, jembishinü akangjungshiteptsü asoshi meranga inyaka arur. Yimjung alitsü asoshi adianu ama aser telungjem alitsü tongtipang lir. Asenok külemi inyakba ajanga dang yimjung asoshi asen nükjidong tongtetsü. Nüburtem külemi inyakba ajanga dang teti asoshi tangatettep alir. Ibai asen asoshi masü, ibai asen chir aser tarutsü putu asoshi lir. Kati ka anema masü saka kati ka den jembishinü akatsü mapang tonggogo. Akangjungshitepba aser tatok agütsüba tanüla ajanga asen Naga nung asoshi tarutsü

jenjang tajungba yanglutetsü ta asenoki aliba dang sayuti, ta ashi. Asen kin telungzük nung temulung melemtepe ali tashi taneptsü angutsü aser teti asoshi yimjung alitsü tasak asütsü aser maneni timtem ajurutsü, kechiaser asen tsükchir temi asen Naga nung tesendaktep raksatsütsü meranger.

Maongka samar aliba, asen kibong aser asen nüburtem, sobaliba aser kin tsungta nükmere aser telemsa adoka aliba nungi asenok tang tashi shia arutsü meranger, ta Naga Hoho sangdong ajanga ashi.

Asen socio-political-economic development bentetsü temeden asoshi mangmangtepa ola adokba bentetsü atema Naga Hoho-i inyaker. Anungji asenok kati ka dak tamang katetsüla aser asenok lemsatsüba yimya balala asenoki koktetsü ta maneni teimla alitsüla aser asen tarutsü asoshi arok ajungtsü atema inyaktüsüla, ta ashi.

Tang Naga nung tensa tia nung Naga kin ajunga pei asoshi bilema inyakba yutsür ajak lungjemer inyaktüsü arok sapang ka ngutetsü nüngdaker. Ibaji ajanga dang tatem nung asenoki asen nübur kanga junga aniogo ta aseni shitetsü.

Kin balala indang lokti tentet aser sectoral representatives balala aser Naga CSOs tem nungi shisatsü meyoktepba ajanga dang telungjem aser adianu ama alitsü

merangba nung temelenshi alitsü, ta Naga Hoho-i ashi.

Naga nung aser Naga Political groups balala dang Naga nung ajaki akumtsüboa aser agizüktsüsa solution bener arutsü atema lungjemer inyaktüsü aser Government of India den mapang talangka nungi atsütepa aruba Naga Political issue bentetsü asoshi lungjemtsü ayongzük, ta ashi.

Naga nung aginüba aser tejangraba angateta ken o tejen ya bentetsü Government of India dang ayongzük, ta Naga Hoho-i ashi.

India aser Myanmar nung aliba Naga nungertem ka kuma lungjemdaktsütsü asoshi Government of India dang Government of Myanmar den jembishinü tenzüktsü maneni ajungshir.

Naga nung kin balala tsungta mangatettep aser metokmeperi tem yutsür asen chir aser tarutsü putu asoshi Tsungrem tenung nung kati ka agizüka, tatok agütsüteptsü ayongzük, ta ashi.

Shinga zungzükba metoktsü arok terenlok asoshi inyaktüsü, kati ka den jungtepa, kin balala tsungta telungjem alitsü, aser ochi nung nokdaka, tatok agütsütepa aser angatettepa taneptsü angutsü, akangjungshiteptsü aser linük telungjem asoshi inyaktüsü sorkar dang ayongzük, ta Naga Hoho ajangasa ashi.

CPO aser WSH lungjemshitsü pangjemtep



CPO aser WSH tsungta shisadokden senden ka CPO Hall, Chümoukedima nung April 11, 2024 nü amandang tangokba noksa.

Dimapur, Rongchii/April 11 (TYO): Chakroma Public Organisation (CPO) aser Western Sumi Hoho (WSH) tsungta shisadokden senden ka CPO Hall, Chümoukedima nung April 11, 2024 anüngdang 11:00 ako nung mena liasü.

Iba senden nung CPO aser WSH nüburtem ajungtsü onük balala jembia liasü.

Iba senden nung, taoba mapang Dhansiripar JCC ajanga Chief Minister's Office (CMO) nem agüja aliba file/application ya Parliamentary election sülenbo bushitsüla, ta lemtet. Parnoki agüja aliba onük aser

takhangba tem asadanga sülen CPO aser WSH ajanga maneni yariteptsü.

Tenyimi Youth Organisation ajanga tenzükba Kiyevi - Lamhainamdi arütsü nung guest house tang teyangludak indang jembitsü asoshi Tenyimi Union Dimapur (TUD) aser WSH tsungta telungjem senden ka amentsüla ta iba senden nung jembia. Iba maparen dak sendakba nung ken o balala lungjemer jembia inyaktüsü lemteta liasü.

Chümoukedima nung indigenous inhabitants nem sorkar department tem nung Grade IV employment

agütsütsüka ta CPO nokdaka aliba nung WSH-i bhukumer ta iba senden nung lemtet aser tarutsü nung nüngdakba mera agitsü atema WSH ajanga CPO den jembishinü akatsü.

CPO aser WSH tsungta taoba mapang pangjema aliba ama parnok tsungta tesendaktep tali akangshitsü asoshi iba senden nung pangjemshia liasü aser kin balala tsungta tesunep aser telungjem asoshi külemi inyaktüsü aser ano Niuland aser Chümoukedima district nung terenlok aser yangji alir nüburtem asoshi tajangzük lenmang külemi bushitsü pangjemtepa liasü.

Environment Ministry-i Assam sorkar dang commando battalion kisü-jensü anentsü tuyu



Guwahati, Rongchii/April 11 (Agencies): Ministry of Environment, Forest and Climate Change (MoEF&CC)-i Assam sorkar dang Hailakandi district kübok teküzmükba kübok aliba arem ali nung Commando Battalion headquarters tasenba yanglua aliba anentsü tetuyuba agütsüogo.

Taoba küm December 25 nü Northeast Now nung osang ka sangdongba dak ajemdaker National Green Tribunal (NGT)-i jenjang agiba sülen iba tetuyuba ya agütsüogo. Osang nung iba project ya temzüng ozüing anema lir ta shia liasü.

MoEF&CC indang Shillong regional office-i tsüngtong oa iba tesem asadangba sülen iba tesem nung kiojen yanglua aliba scale aser permanence indang ashishia liasü.

Kasa report ajansa ali hectar 11 dak tema nung 30,000 square

meters tasazük nung kiojen yanglua aliba ya Forest (Conservation) Act, 1980 kübok taitok agütsür aliba "ancillary activity" ama qualify masür.

Kasa Act kübok arem ali non-forestry inyakym atema amshitsü asoshi centre sorkar nungi temelaba meshitsü nüngdaker ta shia lir. MoEF&CC-i ashiba agi, Assam sorkari iba inyakym ya paitok aser iba ajanga Act nung aibelenogo.

Assam sorkar Additional Chief Secretary (Forests) dangi shiti ka nung MoEF&CC-i, iba tesem nung inyakymtem tangsa tang anena atatsü asoshi takhangba agütsüogo.

Shiti nungsa tetuyuba tasen mesüra telemtetba tanga ka magi tashi inyakym ajak anena atatsü asoshi tetuyuba agütsüogo.

Tetuyuba sülen tashi anga manidakra Forest (Conservation) Act kübok tapet

temerenshi agütsütsü, ta shiti nung shia lir.

Northeast Now report dak ajemdaker NGT-i, PCCF MK Yadava, Inspector General of the Ministry of Environment, Forest and Climate Change, Assam Forest Department Chief Wildlife Warden aser Hailakandi district District Commissioner dang NGT matsüingda nokdaksü tetuyuba agütsüogo.

Assam Cabinet-i 2022 küm July ita state nung commando battalion trok amenoktsü atema telemtetba agi aser unit ka Hailakandi district kübok Inner Line Reserve Forest nung amenoktsü atema shima liasü.

Iba tesem ya teküzmükba kübok liaka iba mapang PCCF MK Yadava-i teyari agüja Hailakandi DFO-i iba project atema arem ali hectar 44 amshitsü atema temelaba agüja liasü.

NSCN/GPRN-i züngsem pongu mapa nung anentsü

Dimapur, Rongchii/April 11 (TYO): NSCN/GPRN-i temesepba mozü achir züngsem pongu people's army military wing nungi anentsüogo.

Staff Officer, Designated Camp Suruhoto Office nungi sangdong ka ajanga Chakhesang region kübok Suthotsu yimtsüing nungi Nuchupu'er jabaso Maj. Shekhoyi, Sumi region kübok Homeland yimtsüing nungi Nikhuyi'er jabaso Capt. Khekato, Sumi region kübok Phisami yimtsüing nungi Ghozheto'er jabaso Capt. Amento, Lotha region kübok Roni Old village nungi Benjamin'er jabaso Lieut. Inato aser Lotha region kübok Pangti yimtsüing nungi Nthio'er jabaso

Sgt. Chipenthung nunger mapa nungi anentsüba metetdaksüogo.

NSCN/GPRN temzüng ozüing sülen manidaki aibelenba atema item aibelenertem ya kecha taochi makai mapa nungi ajanga metetdaksü.

Maneni nüburtem dang temalen shisema aliba nisungtem den NSCN/GPRN dak sendakba ken o kecha nunga shilem magitsü atema kasa sangdong ajanga tekümdangtsü metetdaksüogo. Termination order nungsa, mapa nungi anentsüba züngsemtemi NSCN/GPRN tenüing menüktsüba ngutetra parnok anema jenjang tesashi agitsü ta shia lir.

Manipur nung IPD 24,500 atema polling station anepalutsüogo



Imphal, Rongchii/April 11 (Agencies): Manipur nung April 19 aser April 26 nü Lok Sabha menden ana atema vote agütsütsü pur 20,29,023 rongnung Internally Displaced Persons (voters) 24,500 dak tema lir.

Parliamentary Constituency ana atema polling station 2,955 alitsü aser Election Commission of India-i district 10 nung IDP tem vote agütsüdaksütsü asoshi Special Polling Station 94 anepalutsüogo.

2023 küm May 3 nü nungi tenzüka kin o kin tsüingda mangatettep adokba ajanga Meitei aser Kuki nunger 61,000 dak tema state kübok relief camp balala nung jenoka lir aser ibayongji ECI-i iba jenjang ya agitsüsa kümogo.

Manipur nung Lok Sabha constituency ana lir aser inner Manipur constituency nung Meitei nunger timba lir aser Outer Manipur constituency ya Scheduled Tribes (ST) atema lir.

Manipur indang Chief Electoral Officer Pradeep Kumar Jha-i sangdong ka ajanga ashiba agi, Imphal West nung special polling stations (Inner atema 3, Outer atema 5) 8, Imphal East nung 9 (Inner atema 5, Outer atema 4), Bishnupur nung 22 (Inner

atema 11, Outer atema 11), Thoubal nung 2 (Inner aser Outer atema kaka), Kakching nung 5 (Inner atema 2, Outer atema 3), Churachandpur nung 15 (Inner atema 2, Outer atema 13), Kangpokpi nung 24 (Inner atema 4, Outer atema 20), Tengnoupal nung 4 (Inner atema 1, Outer atema 3), Jiribam 1 (Outer), Ukhrul 4 (Outer) amenoktsütsü.

Manipur nung taruba election ya shilem ana nung agitsü. Inner Manipur menden atema election April 19 nü agitsü aser Outer Manipur constituency koba scheduled tribes atema mekazüka tokja lir iba menden atema vote April 19 aser 26 nü agütsütsü. Manipur nung assembly menden 60 lir.

Inner Manipur PC indang Assembly segments ajak aser Outer Manipur PC indang Assembly segments 15 densema Assembly segments 47 nung election April 19 nü agitsü.

Outer Manipur PC nung tanungba Assembly segments 13 atema election April 26 nü agitsü.

Temetetsü kaji Inner Manipur PC kübok Assembly segments 32 aser Outer Manipur PC kübok assembly segment 28 lir.

Mizoram: Heroin shibelenba atema nisung ka tetuokdaki yok

Aizawl, Rongchii/April 11 (Agencies): Assam den arrtsü nung aliba Kolasib district nung fast track court kati arishi küm 45 tain nisung ka heroin ayokba atema küm 10 tetuokdak ayutsü asoshi obendang agütsüogo.

Iba fast track court obendanger R. Vanlalena-i, aija alisang Zarzova ya heroin gram 324 bena aliba aser ayokba atema aitsüogo. Pa ya Aizawl district kübok Assam den arrtsü nung aliba Mauchar yimtsüing nungi lir.

Iba court yagisa aija alisang dang sen lakh 1 senchi chiogo aser pa ano küm ka talila tetuokdak ayutsü.

Aija alisang shiba bail nung chioka liasü, pa Mongolbarnü okdaki ken o angdangtsü atema ao aser obendang agütsüba sülen tepyuokdaki yokogo, ta ketdangsurtemi metetdaksü.


Zarzova aser Lalduhawma (25) na state Excise and Narcotics department-i Kolasib district kübok Bukpui yimtsüing anasa March 20, 2021 nü apu.

Pa ya tangar ka dang heroin gram 324 ayoktsü meranga aliba mapang pua liasü.

Zarzova ya iba temesepba mozü bener aotsü atema bike anitsü asoshi Lalduhawma-i hire süa liasü.

Okadaki Lalduhawma nem taitok agütsüogo, kechiyong Zarzova-i bike hire asüba mapang pai temesepba mozü bena lir ta memeteti liasü, ta Lalduhawma-i ashi aser pa anema kuli tejangja kecha mali asünung pa maitsü.

LS election magi tsüingda Amit Shah-i Manipur semdangtsü akok



Amit Shah

Guwahati, Rongchii/April 11 (Agencies): Manipur nung Lok Sabha election

mezüingbuba shilem magi tsüingda Union Home Minister Amit Shah-i state semdangtsü renema lir.

Osang ajanga ashiba agi, Union Home Minister Amit Shah-i April 14 mesüra 15 nü Manipur semdangtsü imlar. Manipur nung Lok Sabha election ya phase ana nung April 19 aser 26 nü agitsü renema lir.

Nüboyimer tongtiba ama Shah-i state yimtiba kübok public ground nung nüboyimba sentong ka ayongzüka agiba mapang o jembitsü imlar.

Bharatiya Janata Party (BJP)-i inner Manipur menden atema taoba state

education minister T Basanta Kumar shimogo. Inner Manipur menden kübok Imphal densema lenden nung aliba district tem densema lir.

Taoba küm May ita union Home minister-i security jenjang asadangtsü atema Manipur semdanga liasü. Manipur nung anogo pezü mongzüka mapang Shah-i state kübok lenden nung aser tenem nung aliba district tem nungi nüburtem aser lokti tentet balala den sensaksema liasü.

Kasa mapang nung outer Manipur menden atema Naga People's Front (NPF) candidate BJP nongita yaritsü.



April 11, 2024 nü Kolkata nung Eid benjung sentong nung TMC General Secretary Abhishek Banerjee-i jembidang tangokba noksa nung angur. Ksa noksa nung West Bengal Chief Minister, Mamata Banerjee-a angur.

BJP-i electoral bonds ajanga ochimashi inyaker: Rahul Gandhi

Jaipur, Rongchii/April 11 (Agencies): Brihostibarnü Congress lenir Rahul Gandhi-i, Ato kilonser Narendra Modi aser Bharatiya Janata Party (BJP)-i linük nung ochimashi tulutibaji electoral bonds ajanga inyaker, ta tai tongloktsü.

Brihostibarnü Rajasthan kübok Jodhpur constituency nung Congress candidate, Karan Singh Uchiyarda atema nüboyimsüba sentong ka nung jembidang Gandhi-i, "Rakzükraktemdar aser iba nungjaji electoral bonds lir," ta ashi.

Paisa, 2014 küm Centre nung BJP sorkar aruba sülen nungi industrialist, Gautam Adani indang stock prices jenzang maneni atur, kechiyong

Adani aser Ato kilonser na tesendaktep kanga junga lir ta India-i meteta lir, ta ashi.

"Modi-i, 'Ni ochimashi samatsüner' ta jembir aser pai electoral bonds scheme tenzüük. Industrialist temi (electoral bonds ajanga) sen crore meyrjang aika BJP nem agütsüogo. Modi-i, iba scheme kübok sen agütsür tenüngji shinga nem-a memetdaksütsüla, ta ashi. Anogo ishika tejaklen ang Supreme Court-i iba scheme ya ozüng alema, anungji iba scheme anentsüla ta obendang agüja liasü," ta Rahul Gandhi-isa metetdaksü.

Paisa, Modi sorkar kübok tesüiba küm pongu tsüngda ochimashi tali kümogo, ta ashi.

"Modi sorkari electoral bonds, PM-Cares Fund aser Adani ama ochimashi aika inyakogo. Iba dak alia Modi indang washing machine ajanga linük tesem ajaklen ochimashirtem aibelen samatsür. Modi sorkar ya ochimashi sorkar. PM Modi ketdangsüba kübok item ochimashi ajak ataloker," ta pai ashi.

Survey report ka nung ajemdaker Gandhi-i, nütsüng shilem 55-ibo tesüiba küm 5 tsüngda ochimashi kanga renlokogo ta bilemer, ta ashi.

"Nütsüng shilem 25-ibo ochimashi kanga renlokba ya Modi sorkar ajanga lir ta bilemer. Nüburtemi kuli kecha makaibo yamaji mejembitsü," ta paisa shisem.

Excise policy ochimashi ken o nung CBI-i BRS lenir K Kavitha apu

New Delhi, April 11 (Agencies): Delhi excise policy ochimashi ken o dak sendakba nung CBI-i BRS lenir, K Kavitha puogo; la Delhi Rouse Avenue court matsüngdangi anir aotsü.

Indian Penal Code aser Prevention of Corruption Act kübok Arrla kar nung ajemdaker K Kavitha apu aser Special Judge, Kaveri Baweja-i jail nung Kavitha dang asüngdangyatsü atema Central Bureau of Investigation (CBI) nem temelaba agütsü.

Kavitha ya taoba mapang Telangana chief minister, K Chandrashekar Rao'er jala lir. Delhi nung yi ayoktsü license atema lai Aam Aadmi Party (AAP) lenirtem nem sen crore

100 agütsüogo, ta la nem tai tonglokja lir.

Arrshi küm 46, Kavitha ya taküm March 15 nü Enforcement Directorate (ED)-i Hyderabad nung apuba sülen tang Tihar jail nung lia Brihostibarnü CBI-i apu.

Excise policy ken o nung tai tonglokja alir Buchi Bahu indang phone nung WhatsApp chats aser ali alizükba tezüngzüktep ka dak sendakba nung Kavitha dang asüngdangyago. Delhi nung yi ayoktsü atema license asoshi AAP nem sübokrem sen crore 100 agütsü, ta la densema aliba South Block Group nem tai tonglokja lir.

Honibarnü CBI ketdangsertem Tihar Jail-i oa Kavitha dang asüngdangyaa

liasü. Kavitha-i shidi ka ajanga court dang, central agency temi la anema bushisüngdangba ya media ajanga ken o akaba lir, aser iba ya ajanga la tenüng menüksüogo, ta ashi.

Lai court dang, "Ni ya takoxa angur ka. Kü nija aser yimtenren tenüng menüksütsü atema inyaker. Kü meyong mobile phone television channel ajak nung sayur, aser iba ya kü nija taküm anema inyakba lir," ta metetdaksü.

"Ni agency tem den amalitepa inyaker aser kü meyong bank account osang tejangja agütsüogo. ED-i ni phone ajak raksaogo ta jembir saka ni phone ajak agütsütsü," ta lai court dang ashi.

India nunger 6,000 mapa inyaksü atema Israel-i aotsü

New Delhi, April 11 (Agencies): Yaküm October ita nung Israel aser Hamas na tsüngda rara tenzüükba sülen nungi Israel nung kisüjensürtem aser aayangertem agi kanga anüngba mapang nung April-May ita tsüngda India nungi mapa inyaker 6,000 dak tema Israel-i aotsü.

Israel nung kiojen asüba sector asentenshitsü atema India nunger aayanger aika aotsü.

Israeli Prime Minister's Office (PMO), finance ministry aser Construction & housing ministry longjemer iba mapatong inyaker.

Israel-i construction industry atema bendangertem dak tuluba metaloker. Israel nung mapa inyaker 80,000 shi Palestinian Authority-i ketdangsüba West Bank nungi liasü aser mapa inyaker 17,000 Gaza Strip nungi liasü, ajüsüaka yaküm Israel o Hamas tsüngda rara tenzüükba sülen parnok teimbaka indang 'work permits' agienadokogo.

India aser Israel sorkar tsüngda tezüngzüktep ka agia iba kübok Mongolbarnü India nunger mapa inyaker nisung 64 Israel tonga ogo aser April ita tomlen tashi nung India nunger 850 aotsü, aser tanüngba meyrjang 5000 shi May ita tashi nungbosa aotsü.

Tesüiba ita ishika tsüngda India nunger mapa inyaker 900 Israel-i ogo.

Israeli Contractors Association (ICA)-i screening agia India aser Sri Lanka nungi mapa inyaker 20,000 dak tema agizüktsü sangdonga liasü saka tang tashi nung nisung 1000 shi dang Israel tonga ogo. Israel

nung mapa inyaksü atema shimba sülen India nunger aikati pei teinyakdak mapa toktsüogo aser Israel-i aotsü atema visa atadar.

Yaküm India Ato kilonser Narendra Modi den phone ajanga jembidang Israel Ato kilonser Benjamin Netanyahu-i India nunger mapa inyakerterem tekeraba nung anir aotsü nüngdak, ta metetdaksü liasü.

Israel nung kisü-jensüba mapa inyaksü atema Uttar Pradesh aser Haryana na nungi nisung meyrjang aika shimteta sülen state pongu- Mizoram, Telangana, Rajasthan, Bihar aser Himachal Pradesh state temia Centre sorkar dang Israel nung mapa inyaksü atema parnok state tem nungia aayangertem shimmang, ta mepishia liasü.

January ita tetenzüklen Israel nungi recruitment team ka India-i arua linük tesem balala nung kisü-jensüba mapa inyakerterem aika shima liasü. Uttar Pradesh nungi nisung 7,182 aser Haryana nungi nisung 1,370-i tenüng agüja liasü; anogo tenetnü tashi shimba maparen inyakba sülen iba nungjagi Uttar Pradesh nung nisung 5,087 aser Haryana nungi nisung 530 shim.

Israel nung mapa inyaksü jangrarterem medical test agiba den police clearance, visa aser passport verification agiba sülen anogo 30 tsüngda Israel-i yoktsü.

Israel nung mapa inyakerterem nem itasen sen lakh 1.37 tashi agütsütsü, medical insurance, chiyungtsü, talidak aser ita shia bonus sen 16,515 agütsütsü.



April 11, 2024 nü Chennai nung Lok Sabha election duty lemzüka aliba police anati postal ballot ajanga vote agütsüba sülen tangokba noksa nung angur.

Jammu & Kashmir nung kiralongrarterem den yariteper asem apu

Srinagar, April 11 (Agencies): Kashmir nung sepaitemi kiralongrarterem mita aoba mapang nung LeT kiralongrar ka khaset aser kiralongrarterem den yariteper asem puogo.

Pulwama yim kübok Frassipora area nung kiralongrar ka aliba osang angazükba sülen Police, Army (53RR) aser CRPF (183Bn)-i Brihostibar anepdang züngia kiralongrarterem mita aoba mapang nung kiralongrar ka khaset.

Kiralongrarji Srinagar nungi LeT züngsem Danish Sheikh liasü ta jangjaogo. Iba tesem

nungi prangpong, injang aser tashishitsü kakat kar angu.

Ano tanga tatalokba ka nung sepaitemi North Kashmir kübok Baramulla district nung LeT kiralongrarterem den yariteper nisung asem puogo; parnok ket nung grenade kar liasü.

Baramulla jila nungi Owais Ahmad Waza, Basit Fayaz Kaloo aser Faheem Ahmad Mir nungeri kiralongrarterem den yariteper aser sepaitem senzüsempogba osang kiralongrarterem nem metetdaksür.

Election agitsü mapang ana nung lia Baramulla nung kiralongratsü sentong liasü, ta ketdangsertemi metetdaksü.



April 11, 2024 nü Bulandshahr nung Lok Sabha election nüboyim sentong ka nung Rashtriya Lok Dal (RLD) Tir, Jayant Chaudhary-i Gautam Buddha Nagar nungi BJP candidate, Dr. Mahesh Sharma pusema jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, APRIL (RONGCHII) 12, 2024

Lumi anenba benjong

Yashi Muslim nunger benjong Eid-al-Fitr liasü, ajisüaka India yabo tamangba yimsü ajak nem kasa akhüm agüja külemdaktsüba aser benshidaktsüba 'Secular' lima ka asünungji, office aser kaketrejutem ajak shibanga yur mungogo. Atangji, Eid benjong-bo Muslim nungertem dang amunger, ajisüaka tangar tamangba yimsü amangertemia aküm agüja anogo süidaktsüba topur kanga junger. Iba Eid benjong ya Muslim nungertem anogo 30 nü anü adokli nungi anü mai tashi lumia sarasadema amongba sülen chiajema pelatepa amungba benjongmung ka lir. Muslim nungertemi Eid jakdang anogo 30 nü anü lia tzüa majem lumibaji asenok asoshi tayongzükba tuluka asütsü, kechiyong parnok lumiba anogo semer nüjibo mapa meinyak anisüngzuka kidang amunger masü saka akhi inyaka aliba mapa kasato inyaker. Atangji, parnoki anü madokdang aser anü lur külen chia ajemer, ajisüaka asenok asoshibo anü lia kecha machi aser majem mapa inyaka amongtsüabajibo kanga tasak aser aikati makoktsü. Iba lumiba ita dangji Muslim nungertemi temeshi ita Ramadan ta ajar. Iba lumiba mapang nung parnok tamang nung aiener aser temeim mapa tali inyaker. Asenok Khristan-temibo masüa ta ashitsüa akok, saka Muslim nungertemi Eid benjong amungba tetezü aser tamaitüsü akhi tejen putu nung Abraham-i par chir tambusang Ishmael Tsüngremi meshiba ama pa taküm tenla agütsütsü mulungtetba bilemteta amungba benjong lir. Aji oda, iba Eid benjong nung Abraham-i Tsüngremi ashiba angaba aser par jabaso Ishmael melen san tepong ka tenlaba bilemteta Muslim nunger kibong shia nung san aser nabong tepseta kinunger aser tembartem külemi pelatepa chiyongteper. Atangji, asenok Khristan-tem Laishiba nungbo Abraham-i Tsüngremi meshiba ama par jabaso tenla agütsütsü atema Moriah tenemi anir atubaji Isac liasü ta azünger. Ibaji Muslim nunger Eid amungba otsü den meputeper. Ajisüaka, tetsü taso len bilemdangdi süra kilitsüri asoba asüyonga Isac dang nungibo Ishmael tambu liasü. Ibajibo Abraham dang asüngdangtsüba dang, anungji tang mebandangtetsü. Ajisüaka, Eid benjong amungba nung tagitsüji ita ka lumia sarasadema akhi alu mapa inyakba ya asütsü. Asenoki khen khen kechalen ma aser kecha meinyak lumia sarasadema amungba ya balaka, ajia junger saka asenok lumiba o Muslim nungertem lumiba na ya tetsüngda talangka itepa lir. Koba tamangba yimsü südir süang, nisung ka lumibaji pei temang nung timtem agia Tsüngrem dang sarasademba mapang lir. Idangjiang, nisung tanüla o Tsüngrem tanülaji züngzunga ajuruteptetter aser alima nung lumia sarasademertem temoatsü angur. Atangji, Muslim nunger amaji anogo piyong mapa inyaka lumibajisa timtatamba aser shi temang nung asensasa timtem agia lumia saraasademba akhi mapang sarasademba dang nungibo kanga agia taretba asütsü. Idangji Tsüngrem ajurur aser tamang tuluba küma aiener. Ibayongji, Muslim nungertemibo par Tsüngrem Allah aser par tamangba Muslim yimsü kumzuka ayutsü asoshibo pei taküm tenla dena agütsütsü metsübur. Amangli amangerbo tasü tsüba masü saka pei taküm tenla agütsütsü dena metsübu yamaji amangtetba tamanger asütsüba asenok dang Muslim nungertemi sayur. Aji oda, alima nung nütsüng nüboa parnoksa teimba aser tekaraba renloker aser tamang nunga parnoksa tainba aser tasü taitba ta süra memenui kum ishika tsüngda alima ya Abraham aser Ishmael dak nungi jakzükertem meyong akümtsü. Asenokibo lumia meluminer aser sobaliba aser tamangba yimsü dak aketba benjongbentsüa memongner, anungji asenok taküm aser tamang jenjang pongbapongbaa kumogo. Ajisüaka, lumia sarasademba agibo ajak akoker aser sobaliba aser yimsü dak aketba benjongbentsü munga yimtsür yimer, kinunger-adianu aser medemertem ajurutepa pelatepbaji kin ka aser lokti ka tashi angudak aser agütsüdak akümer.

OLEMSABANG NAGA KIN LIA ARUBA

~ M.Meren Ex.Pastor Ungma

Naga kin ya Chungliyimti ser temalen koda lia aru ibaji tanü tashi shingaia tejangja kuli magütsüteter, saka oagi alidangji asenok tangar kin kar kübok lia aruba kuli tejangja kecha maka, saka Chungliyimti nung alidangbo asen Naga kinji tejangja kin ka liasü aser iba tesem nung alidanbo joko yimden jungjunga lateter kin kidong tabensa shitsüng-shiben alangteta ibaji shir agitsüla saka shirbo magitsüla ajakji bentet-benteta benshia aru aser putu mendenji shidakba Democracy yimya nung tenteta benshi. Asen India nunger Democracy yimya yabo tema Democracy saka telong nungbo tashiyim benshiba yimden lir. Saka asen Naga kinbo arok yimsütsüba putu mendenji küm 30 alangteter nübur madak ochi agi yimsü süa aru. Anungji Naga kinji lipok nungi pei sasa yimsü süa aruba kin saka asenok yim ka o ka na tsüngta nungbo yimjung mali letepa dang aru. Kechiaser asenok tetenzük nungi konang bushiba kin liasü, saka England, China, Japan aser Russia amala den kodanga rara maru aser parnokia kodanga yimtsüng kata maka marudang aser par kübok jia melidang ta yamaji Naga kinji lia aru. Aser asenok sasa tetenzük nungi asen sasa lia aru ta asüyongbo ano Chungliyimti ser temalenji shirnoki anir Chungliyimti tashi anir aru ibajia shibai shitettsü? Aser Chungliyimti temalenji yimsüsürtemji shirnok liasü ta ajia shibai shitettsü? Anungji Naga kin ya nisung küma aruba ano mapang talangkabo masü ta bushitetter, saka British küboki aitsü tenzükba yabo 1830 temalen nungi tanemi tenzük saka parnoki asenok nüchi kümdaktsütsü asoshi kecha meinyak, saka Naga kin parnoki amokbangbapur ajakji par khu bener Alar ama ayutsü nükjidong dang liasü ta par mapa nungi angateter. Saka kodang American Missionarytem aru parnoki Naga tenem pungteter lia aoba mapang nungi Naga nungertemji Nüchi ngudaktsütsü merang aser Education lenmang lapoktsü, saka British nungeri awabanga aliba litsü tashi nungbo Naga nungertemji Class III dak alaka mezüngdaktsü, shirnok Class III tashi azüng parnok nem mapa agütsü, anungji Class III tashi zünger overseer mapa agüja inyadaktüba ngua aruogo. Aser tazüngertemjia pei sobaliba süoshi dak alaka parnok sobutsü kenyongi mesopudaktsü, aji oda Impur nung azünger shirnok British Sorkari teyari agütsür parnokji pei sobaliba sü magira teyari magütsütsü ta ser teyarji sota ayu, anungji koda masü tia ajuru nungji Impur nung azünger ajakji Assam nungeri agiba duti agir azüngba angur.

BRITISH NUNGER KUPOKI AIBA

1832 küm British nunger capt. Jenkins aser Capt. Pemberton tenati British Army aika anir arua Naga lima amaktsü tenzük, anungji Naga nunger o British nunger na tsüngta rara tenzük, iba mapangjisa ano British nunger telok kati Angami lima Konoma yim maka aru anungji parnoki British Army denji kanga meranga raraa tanishir kati anir Army aika tepsetdaktsü, saka tesü tamakok angu. Yamaji Naga yimtsüng aika maktetdaktsü aser joko 1877 - 80 tashi nungbo joko Kohima mesemtet, aser Wokha mesemtet, aser 1888 nungbo Mongsenyimti mesemtet, aser 1889 nungbo Mokokchungnung Sub Center yanglua temeket yimtem azüoka aru. Saka parnoki atsüngba yim kar kar dak alaka Naga lima ajakbo magitet aser parnoki ali melena mesarutet, oda Naga lima shilem pezü nung shilem ka nung dang ali melen senbak ana na saroa parnoki yimsü asü. Iba ama parnoki ali melen saroa tesem kar kar nung yimsü süa aruaka parnok o Naga nunger na tsüngta tenangzüktepba aser tezülutepba kecha maka ta jemba aru. Saka parnok o asenok na tsüngta yimjung nung lidi ta tebang o agi dang jemba aru ta ashir, saka onok nenok kübok lidi ta nangzüktepba kecha maka ta ashir, anungji Naga nungerji iba tashi nungji asenok pei sasa dang lia aruba kin ta jangjateter.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Jesus Calls Ministry-i Jalandhar nung India nung 108buba Prayer Tower semzükba mapang tangokba noksa nung angur.

Supreme Court-i Indore nung sarasadem sentong agitsü mela

Bhopal, April 11, 2024

(Agencies): India nung tematiba court- Supreme Court-i Madhya Pradesh kübok Indore district ktdangsertem dang Khristantem sarasadem sentong agitsü aliba atema temelaba agüjang, ta tuyu.

Hindu yimsü alia amangertemi Khristantem sentong agitsü memelatsü atema district ktdangsertem dang mepishiba sülen ktdangsertemi sentong agitsü memelai liasü.

April 10, 2024 nü Supreme Court bench kati, "Temelaba magütsüba tim masü, ta mezüng bushisüngdang ajanga onoki jangjaogo, anungji sentong agitsü temelaba agüjang," ta tuyu.

Justice B R Gavai leniba nung akümba bench-i Indore nung district collector dang sayutsüngir, Paul Dhinakaran-i Tsüngrem O jembitsü aliba sentongji agitsü temelaba agüjang, ta tuyu.

Paul Dhinakaran ya Jesus Calls Ministry nungi lir aser iba Indore nung iba sentong agitsü atema National Prayer and Ministry Alliance-i ayongzükba liasü.

April 11 nü osangbener den jembidang sentong ayongzükba tongti, Suresh Carleton-i, "Supreme Court-i onok nem ochi temeden agütsüba atema pelar," ta metetdaksü.

"Onoki April 10 nü sentong ayongzükba liasü saka kasa anogo nung Supreme Court-i iba tetuyuba agütsü, ibayongji tanü iba sentong thinentüsü aküm. Onoki tekeraba nung tanga anogo ka nung ang iba sentong agitsü," ta paisa metetdaksü.

Tamil Nadu yimtiba, Chennai nungi Paul Dhinakaran ya India nung

kanga nüngtugu sayutsüngir ka lir aser pai linük tesem balala nung evangelistic sentongtem ayongzükba agir.

Pa lenisüba kübok India nung 'Prayer Towers' 100 dak tema amenokogo.

Indore nung ayongzükba sentong nungji denomination balala nungi Khristan 8,000 shi adentsü imlaa liasü, ta Carleton-isa metetdaksü.

March 22 nü Indore district administration-i April 10 nü Khristantem sentong agitsü atema temelaba agüja liasü saka April 6 nü Akhil Bharat Hindu Mahasabha (all-India Hindu grand council) nungi züngsemtemi Khristantem sentong anema Indore police commissioner nem tashishiba ken o agüja liasü.

Iba ama sentong nungji tangartem Khristan yimsü dangi meyipdaksütsü, anungji sentong agitsü temelaba agüja alibaji ageintsüla, ta parnoki mepishia liasü.

Hindu nungter teloktem jagi, Khristantem sentongji Hindu nungertem Khristan yimsü dangi meyipdaksütsü atema lir, aser iba ama sentong agiba ajanga tamangba yimsü balala amangertem yimjung nung aliba raksatsütsü, ta metetdakja liasü.

Iba sülen anogo ka dang lirbo April 7 nü district administration-i Khristantem sentong agitsü temelaba agüja alibaji agienadok, ta Carleton-i metetdaksü.

Suresh Carleton-i, "Iba sentong agitsü atema sorkari onok nem anaben temelaba agüja liasü. Mezüng March 22 nü temelaba agütsü. Iba sülen April 5 nüa temelaba agütsü, saka April 7 nü shidi ka ajanga onok dang temelaba agüja alibaji agienadoker ta metetdakja liasü," ta ashi.

April 7 nü Indore

parliamentary constituency nung assistant election officer-i Khristantem nem temelaba agüja alibaji agiena liasü.

Carleton-ibo, iba sentongji state nung Khristantem temeja atema dang liasü aser linük nung yimjung aser tesünep atema Khristantem longjemer sarasademtsü asoshi liasü, ta ashi.

"Iba ya parnok asalentong tamajung ka liasü aser district administration-ia Hindu teloktem pusema inyak," ta paisa metetdaksü.

Iba sülen Khristan teloktemi Madhya Pradesh High Court nem temepishiba agütsü saka temepishiba magizükba agi maneni Supreme Court nem kasa temepishiba agütsü.

"Tematiba court tetuyuba ajanga Hindu nungter teloktemi state nung nütsüng ajema aliba Khristantem anema yazü jembiba jangjar, aser sorkar ktdangsertemia kecha meshisadangi inyaker," ta Carleton-i ashi.

India nung state 11 nung anti conversion ozüngtem benoka lir aser item state rongnung Madhya Pradesh-a densema lir.

Madhya Pradesh Freedom of Religion Act ozüng ajanga kangshia mesüzüka mesüra tim masüba lenmang balala ajanga tamangba yimsü meyipdaksüba memelar. Iba ozüng kübok talisa Khristantem aser Muslim nungertem nem tiyazü nung tai tonglokja apur.

Nütsüng million 72 aliba Madhya Pradesh nung Khristan nütsüngbo shilem 1 dang nungi tajemba lir, ajisüaka state nung Hindu telok balalai Khristantem sarasadem sentongtem nokdangba den külemi Khristantemi ktdangsüba school, hostel aser orphanage anema inyaker.

ANOGO ABEN TSÜNGREM DEN

Memetetba Ola

"Arogotem dang Tanelai kechi ashir shiba tenarong aten pai angang" - J.Adok 2:17

Temeim techir, Ne yimya tekoloki dangbo Tsüngrem mapa tarokji angatetsü makok. Pa miim mapa angatetsü asoshi Ni ne mulung lapoktsütsü. Tsüngremi pa meimertem asoshi kechi renema lir tenük agi mangur, mesüra tenarongi mangashi, mesüra nisung mulungjangi mai. Saka pai itemji Ni ajanga nenok dangi jungkai adoktsü. Ne dak kechi lir ne tanelai dang metetba ama, Ni dang Tsüngrem mapatemji metet, kechiaser Ni pa tanela lir.

Tsüngremi pa o nung nangzükba akabatem Ni nai kata mengui melidaksüner. Kü tenzükertemi item temoatsütem parnok tekolok techira agi rasaa meshitetsü. Parnoki ni apuoktsüba jembir (1 Kor. 2:9-13). Kodang nai Ni jembiba angadir, tiyazü tesayur shingaia na mekülakokdaksütsü (1 Yn. 2:26,27).

Laishiba bushitsü sentoka teyutsü. Ibaji dang amfang lima nung taniba petinu lir (2 Peter 1:19). Memetetba ola agi na tekülakokdaksü. Nia Kü mulungka agi mejembitsü. Tebu aser Techiri ashibadang Ni jembitsü (Yn. 16:13;15:26). Zülua aliba o jagi na memelenshidaksüra, lendong tia indang Ni ne nem koda bilemtetdaksütsü? (Yn. 14:26). Posü ama Ni ajemalur. Ni Küsasa agi shinga dak tashiyim agi meinyaksü. Teyari asoshi nai Kü dang masüngdang tashi, na Lai bushiba nung Ni meyaritsü (T.Ken 119:18).

Easter mapang Nigeria nung Khristan 10 tepset

April 11, 2024: Easter mapang nung Nigeria nung Khristan 10 tepsetba osang ka jangjaogo; Easter Monday (April 1) nü Fulani teloki Nigeria kübok Plateau State nung St Thomas the Apostle Arogo amakdang mashisa tetsür ka Aid to the Church in Need (ACN)-i metetdaksü.

Pankshin Diocese nung director of communications, Andrew Dewan-i, kiralongrartem jagi mashisa tetsür ka tebokji arang aser no menden nung aliba tanurjia maochii tepset, ta ashi.

"Iba ama amakba ya manener. Parnok ya Khristmas mapang amakertem den tesendaktep alitsüa akok," ta paisa metetdaksü.

Yaküm Khristmas mapang anogo pezü tsüngda Fulani teloki Bokkos kübok yim 26 nung Khristan 300 shi tepseta liasü. Item tatalokba sülen Bokkos nung internally displaced persons (IDPs) atema camp 16 amenoka nisungtem jenokdakja lir.

Putir Dewan-i, Fulani züngsem ana tepsetba agi ibaji mangyanga Easter Monday nü Khristantem amak asütsüa akok, ta metetdaksü.

"Sorkari security junga magütsür. Timtem mapang nung nüburtemi sorkar dak temelung melemteter, ibayongji aikati Tenla kitem nung jenoker," ta pai ashi.

"Khrista osangtajung maneni sayutsüngitsüji onok mapa saka sorkar danga nüburtem kümzüktsü atema ajungshitsüla," ta pai ashi.

"Tamang ajanga tongtibang shilem agir. Tamang ajanga jenshia alirtem taküm alir, yamaji mesüra Khristan aikati tanga yimsü dangi meyiper lila. Item ama tayongzükba jenti liaka jenshia alirtem tamang jenjang tashi itta lir," ta pai metetdaksü.

Paisa ashiba agi, Arogotemi jenshia alir jenti yaritsüji kanga tasak, ajisüaka Arogoi maneni item ama nüburtem yaria arur.

"Ita shia nisung meyirjang aika atema sorochoktsütsüji tasak. Item ama emergency mapang atema onoki chiyungtsü rizünga mayur, ibayongji aiben jungdak timtem ajurur," ta pai ashi.

"Onoki organisations balala dang item ama tensa mapang nung timtemertem yaritsü atema Arogo nung teyari agüjang ta mepishir," ta paisa metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Süma

(n) awaashiren nungi langtem dang ajaba (slang for traditional men's loin cloth)

* Oboula meyong süma tejen ka dang liasü.

Süng

(n) tu keta meyiba tedongtem saka au aser süngkümba madentsü (wood)

* Kidang süng tatsüksü teti akatsü nüngdaker.

OLONG PAITEP # 6754

1		2		3		4	5			
				6						7
		8								
9				10		11				
			12						13	
						14				
16						17				

TIPLIN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6753 TELANGZÜBA

TIPLIN :

- 1. Mata, 5. Ocet, 6. Tekülak,
- 10. Ana, 11. Bilemdang, 12. Kar,
- 14. Chisang, 16. Aket, 17. Tepi.

LANGTSÜNGLEN :

- 1. Metsü, 2. Asü, 3. Yiar, 4. Tekong
- 7. Kilir, 8. Ber, 9. Odi, 10. Anasa,
- 11. Bangka, 13. Shin, 15. Sot.

NAI-A YA METETTER MA

INDIA ATO KILONSERTEM:

- 1. Jawahar Lal Nehru- 15 August 1947 nungi 27 May 1964; küm 16 years, anogo 286
- 2. Gulzarilal Nanda (Acting)- 27 May 1964 nungi 9 June 1964: 13 days
- 3. Lal Bahadur Shastri- 9 June 1964 nungi 11 January 1966; küm 1, anogo 216
- 4. Gulzari Lal Nanda (Acting)- 11 January 1966 nungi 24 January 1966; anogo 13
- 5. Indira Gandhi- 24 January 1966 nungi 24 March 1977; küm 11, anogo 59
- 6. Morarji Desai- 24 March 1977 nungi 28 July 1979; küm 2, anogo 126
- 7. Charan Singh- 28 July 1979 nungi 14 January 1980; anogo 170
- 8. Indira Gandhi- 14 January 1980 nungi 31 October 1984; küm 4, anogo 291
- 9. Rajiv Gandhi- 31 October 1984 nungi 2 December 1989; küm 5, anogo 32
- 10. V. P. Singh- 2 December 1989 nungi 10 November 1990; anogo 343
- 11. Chandra Shekhar- 10 November 1990 nungi 21 June 1991; anogo 223
- 12. P. V. Narasimha Rao- 21 June 1991 nungi 16 May 1996; küm 4, anogo 330
- 13. Atal Bihari Vajpayee- 16 May 1996 nungi 1 June 1996; anogo 16
- 14. H. D. Deve Gowda- 1 June 1996 nungi 21 April 1997; anogo 324
- 15. Inder Kumar Gujral- 21 April 1997 nungi 19 March 1998; anogo 332
- 16. Atal Bihari Vajpayee- 19 March 1998 nungi 22 May 2004; küm 6, anogo 64
- 17. Manmohan Singh- 22 May 2004 nungi 26 May 2014; küm 10, anogo 4
- 18. Narendra Modi- 26 May 2014 nungi tang tashi.

Manipur nung UPPK züngsem ka den prangbong injang apu



Imphal, Rongchii/April 11 (Agencies): Manipur police-i Bodhbarnü tongtibang tesem ana meita aoba mapang United People's Party of Kangleipak (UPPK) shirnok dang People's Revolutionary Party of Kangleipak (PREPAK-UPPK) ta ajar iba telok nungi züngsem ka den prangbong injang puogo, ta police-i Brehostibarnü metetdaksü. Mezüngbuba tesem meita aoba mapang arishi küm 27 tain UPPK züngsem

Angomjambam Mendel pua liasü. Pa ya Imphal East District kübok tesem ka nung atsüker lia apu. Angomjambam ya rakzükrakdemba aser nisung aser telok balala dang nungi sen akhangba nung densema liasü, ta police-i ashi. Kasa mapang nung Kangpokpi District kübok North Changoubung tesem nung lendong ataloktsü ana nung aliba tesemtem security

forces temi meitaogo. Meita aoba mapang Baofeng (walkie-talkie) ka den battery, Baofeng Charger ka, INSAS Rifle magazine tazüng ka, HE-36 hand grenade (defective) ka, 9mm Pistol ka den magazine tazüng ka aser injang 22 nguteta liasü. Aija alisang aser police temi ngutetba prangbong injang aser hadirtem ya ken o dak sendaka aliba police station nem bendanga agütsüogo.

Mizoram: MZP-i MPSC mendenbuba mapa nungi anentsü akhang

Aizawl, Rongchii/April 11 (Agencies): Mizoram Public Service Commission (MPSC)-i ayongzüka agiba tatidang nung answer sheet kar nung temulung malemtsü aiba nung kar aliba ngutetba sülen state nung kaketshir lokti tentet tongtibang Mizo Zirlai Pawl (MZP)-i Bodhbarnü commission mendenbuba J.C Ramthanga mapa nungi anentsü takhangba agütsüogo. Aizawl nung osang benertem den sensaksemba mapang MZP Tir H.

Lalthianghlima-i ashiba agi, MPSC-i ayongzüka agiba taoba combined competitive examination nung temulung malemtsü aika lir, kechiyong candidate temi anguba marks melenshitsu aitema answer paper aika nung examiner temi correcting fluid amshiba ngutetogo. Paise, candidate temi anguba marks melenshitsu aser correcting fluid amshia zülushiba kuli lir, aser iba ajanga commission-i ochishia inyaker minyaker aji ashishitsu

kümogo, ta ashi. Taoba mapang ama masü MPSC-i answer papers tem magütsütsü, ta paise shisem. Kaketshir lokti tentet yagi commission meraket kümzüka ayutsü atema commission mendenbuba dang iba hoptasa mapa nungi anentsü takhangba agütsüogo. Parnokisa, atakzüka aliba anogo tashi nung mendenbubai mapa metoktsüra parnoki asendenshir longkak kanga sashia aittsü, ta tekümdangtsü metetdaksüogo.

Tripura nung sen lakh 55 alang ganja apu

Agartala, Rongchii/April 11 (Agencies): Tripura Police-i Bodhbarnü nisung ana ket nungi sen lakh 55 alang ganja puogo. Ozüng alema shibelenba ganja ya Kumarghat tesem nung apu. Kumarghat Police Station Officer-in-Charge Sankar Saha-i ashiba agi, ganja shibelenba atema ambulance taila ka amshiba indang osang tejangja ka angazükba sülen parnoki meita aoba sentong ka ayongzüka agia liasü.

Saha-isa, shibelenertemi ambulance amshitsu atema shim kechiyong yimya agi ambulance menokdang aser sota ken o mashishir, ta ashi. Osang tejangja angazükba sülen police-i Kumarghat nung checkpoint ka amenoka liasü. ken o dak sendaka aliba gari ya police temi sot, ajisüaka jena aotsü meranga liasü. Ajisüaka Sub-division Police Officer Kamal Debbarma den longjemer sepaitemi iba gari ya arishi tenzük aser kilometer 5

shi arishia aoba sülen pua liasü. Gari sotba sülen bushisüngdangba mapang sen lakh 55 alang ganja seret 272 gari nung bena aliba nguteta liasü. Ken o dak sendakba nung Sonamura aser Sepahijala District nungi Titian Miah aser Mamon Miah na puogo. Iba den külemi ano tena ket nungi number plates taila asem tashi puogo. Ken o ashishiba sülen ganja ya Assam-i bener oya liasü ta ngutetogo.



Aizawl: Mizoram Lok Sabha menden ka atema Congress nominee Lalbiakzama-i Mongolbarnü ashiba agi, pa Lok Sabha election nung shimra pai Myanmar aser Mizoram na tsüngda arrtsü aden shishilembaba tenzükshitsu atema jenjang agitsü. Mizoram nung Lok Sabha menden ka atema election April 19 nü agitsü.

Vietnam tycoon Truong My Lan nem tasüba temerenshi agütsü



Ho Chi Minh City, Rongchii/ April 11 (Agencies): Sen billion \$12.5 ashikülaka agiba nung shilem agiba mechi Vietnam nung aliba court kati property tycoon ka nem tasüba temerenshi agütsü.

Brehostibarnü Ho Chi Minh City nung iba ken o jembiba nung Van Thinh Phat indang mendenpula Truong My Lan-i ozüing alema sorkar sen agiba, sübokrem amshiba aser banking rules nung aibelenba ngutet, ta state media ajanga ashi. Iba obendang tanaben benoka jembishitsü asoshi anogo 15 lir.

Arishi küm 67 tain Truong May Lan yagi 2012 aser 2022 tsüingta temelaba makai Saigon Joint Stock Commercial Bank (SCB) amshi aser maliba company meyerijang aika ajanga sen benden aser sorkar ketdangsür nem sepokrem agütsü.

Lai ozüing alema sen bendenba ya 2022 küm Vietnam indang gross domestic product (GDP) shilem asem shi den sako liasü aser prosecutor temi la meyong ki o jen 1,000 dak tema pua lir ta ashir.

Lan-i item taitsüba magizüker aser la kübok inyakerem tenüing asener. Taoba hopta court nung lai tatem o jembidang, lai soseta asütsü bilemer ta shia liasü.

"Teimla ajunga samar ni asütsüa bilem. Iba business environment tesashi - banking sector - nung shilem agiba ya tamachi mapa ka liasü ta ni kanga jashir, koba indang ni junga memetet," ta lai ashi.

Ken o tamajung asüba yong iba temerenshi tesashi ya agütsür ta court-i ashi aser sen meyipa angutsü teimla khenyongi maliba mapa tamajung inyakba nung Lan ya tekolak liasü ta ashi.

La mapa ajanga kija aser lokti indang ki o jen ketdangsüba temeden nung aibelenba kija masü saka SCB ya 'special conrtol' kati yoka Party aser State indang lenir dak nürburtemi tamang makatetsüsa akum, ta obendang nung ashi.

2016 küm nungi tenzüka tang tashi ochimashi mapa inyakba anema mera balala agiba nung Lan apuba ya tulutiba liasü.

Blazing Furnance campaign ta nüngja agüja aliba inyakyim ya Vietnam nunger yimtenren tematiba jenjang anakshija küm ishika tsüingta tir ana aser ato kilonser ana mapa nungi anen aser ketdangsür noklang aika metongshitsü mesüra tepuokdak ayu.

Shilem 90 Lan meyong Saigon bank nungi sen agizüksü asoshi loan applications taila yanglua amshi ta tai tongloksüba sülen nisung 86 anema ken o benokba nung Lan kinungbo aser Hong Kong investor Eric Chu Nap-Kee ya dena liasü. Lan'er kinubger Truong Hue Van ya Van Thinh Phat indang CEO liasü aser nürburtemi meteta aliba nisungtem anema ken o benokba rongnung la ya ka liasü.

Thanh Nien osangkaket ajanga ashiba agi, iba ken o nung metdong 84 nem temerenshi

agütsüba ya küm asem nungi takum tepiyong tepuokdak ayutsü lir.

Truong My Lan-i Saigon Commercial Bank nungi sen \$44bn (£35bn) apuba aitsü. Obendang nung lai sen \$27bn meyiptsütsüla ta ashir saka iba sen ya kodanga mongutettsü ta prosecutor temi ashir. La nem tasüba temerenshi agütsüba ya court-i la dang samar aliba sen billion ishika meyiptsütsü ajungshiba lir ta nisung kari amanger.

Iba ken o jembiba nung kuli agütsütsü nisung 2,700 jaok, state prosecutor 10 aser lawyer 200 shi iba ken o jembiba nung aden ta ashir.

Kuli ya süngten 104 nung liasü aser tuozük tonnes trok liasü. Truong My Lan ya Ho Chi Minh City (tamalen Saigon ta jaa liasü) nung Sino-Vietnamese kibong nungi lir. Iba yimti ya akhi mapang nungi Vietnamese economy indang commercial engine ka liasü, kong ethnic Chinese nunger aika alir.

La ya market stall vendor ka ama la tetsü den külemi cosmetics yoka liasü, saka 1986 küm Communist Party-i achayanga rongsenketzüng nung temelenshi arudaktsüba sülen lai ali o ki o jen ali tenzüik. 1990s tashinung hotels aser restaurants aika nung la kibur akum.

Vietnam nung ali ajak sorkar meyong. Aser item ali agitsü asoshi sorkar ketdangsür den tesendaktep tajung alitsüla. Rongsenketzüng ainba den külemi ochimashi tali akum aser wara ama akum.

MOLUNGNEN O

Ni rara tajungji raraogo, Ni alizung tonga asemogo, Ni tamangji yuogo - 2 Timoti 4:7



Late. K. ALEM. ASI (Changki)
23/06/1968 - 07/04/2024

Onoki teti meima aliba asür K. ALEM (Changki) ajungbena 07/04/2024 anogo nung iba lima nungi pila aoba mapang nung Arogo, lokti, kija aser kibong balala shimokisa nübo,rongsen, shisatsü aser sarasadem agi yaritepogo, nenok ajak dang kanga pelar.

Onoki nenok nem meyipa kecha magütsütetaka, nenok temeim mapatem kodanga mamatettsü. Tulusang Tsüngremi nenok taküm moajang-ta ozü tamang sarasadem.

- Temeim Kinungtsü, Jabaso, Jala aser Kinungterem.

South Korean opposition-i parliamentary elections akok

Seoul, Rongchii/April 11 (Agencies): South Korea nung general election agiba nung liberal opposition party temi tetsüingta tulu keter takok ngua parliament par keti aitogo.

National Assembly nung menden 300 aliba nungi Democratic Party (DPK) aser opposition party tila temi menden 192 angu.

Iba election ya Tir Yoon Suk Yeol asoshi midterm referendum ka ama ajir, shiba kümsük atemtsü küm asem anünga lir.

Par party lenir Han Dong-hoon mapa yutsüogo aser Ato Kilonser Han Duck-soo-ia mapa nungi anentsü asüingdanga lir.

Ibai Yoon aser People Power Party (PPP) asoshi tamakok tulu lir, shirnoki DPK ajanga amokbanga aliba legislature nung par tejangraba inyaksü timtema aru. DPK-i takok anguba tetetzü parnoki parliament ajanga legislation tem tekeraba nung benoktetsü.

South Korea electoral system kübok vote timba bendentsü mechi DPK aser PPP yagi party tilatem amshir, aser parnoki party tila tem nem menden kar agütsür saka ken o balala jembiba mapang menden azüingdang nungdakba ama teyari monguteter.

"Ibai Democratic Party indang takok masü nürburtem asoshi takok tulu lir," ta DPK lenir Lee Jae-myung-i

Brehostibarnü ashi. "Tang rongsentekzüng timtem ketdangsütsü asoshi anatsülen nungi yimten yimsüsür temi tashi agütsütsüla," ta pai osangbener dang ashi.

Brehostibarnü result ya ajanga Lee-i ano tir asoshi tokteptsü temulung ulushitsü, shibai 2022 tir election nung tera agi dang Yoon makok.

Yoon asoshi teinyaktsü mapa jenti lir aser item rongnung chiyongtsü jenjang atuba, nütüing yongsük kanga kera ajemba aser doctor temi tang longkak aita aliba ya dena lir.

Osettsüset nung jenjang atuba ajanga nürburtem dak kongshiba indang pai memetet ama ajitetba atema tawa pa aija liasü.

Taoba ita pai Seoul supermarket semdangba mapang green onions tejong ka nung sen won 875 (India nunger sen 53 shi) meshiba ya tim dang lir ta ashiba atema pa aija liasü.

Iba chiyongtsü ya subsidies asüba ajanga jenjang ajemba lir aser asangsang nung sen won 3,000 aser 4,000 (India nunger sen 182-243) tsüingta meshir.

Ano Yoon kinungtsü Kim Keon Hee-i sempet ama jenjang aketba yangkhu agizükba atema mangatettep adoka arur aser par party nung lenir temi ochimashi mapa inyaker aser tim masüba nung tashi amshir ta tai tonglojka lir.

Ajidang masü DPK sasep nunga mangatettep adoka lir.

Russia-i asendenshir Ukraine amaker, Zelensky-i tembar linük aitsü

Lyiv, Rongchii/April 11 (Agencies): Russia-i asendenshir amakba mapang Ukraine-i military aid aser air defence systems nungdaker, ta Tir Volodymyr Zelensky-i ashi aser par tembar linüktemi jembishinüba nung mapang talanglang agiba aser mangu ajia yutsüba aija liasü.

Russia mitkar temi Ukraine kübok region pungo maka nisung tenet tepset aser substations aser power generation facilities densema ki o jen raksatsü, ta Ukraine ketdangsürtemi Brehostibarnü ashi.

Yasüing Russia-i missiles 40 dak tema khaloktsü aser drones 40 shi amshia amak, aser aika energy infrastructure nung tenük yoka liasü, ta Zelensky-i ashi. Item yagi Ukraine atema air defence kanga tongtipang akumba sayur, aser Russian missiles aser Iran-i yangluba one-way drones tem Ukraine dak khaloktsütsü memelatsüla, ta pai X nung post sütsü.

Southern Odesa nung Governor Oleh Kiper-i Bodhbar aonung pa indang Telegram channel nung ashiba agi, Russia nungeri missile

khaloktsüba nung arushi küm ter tanur tetsür ka densema nisung pezü asü aser aika kanga sashia yiru.

Iba region indang air defences ajanga Iran-i yangluba drones tenet energy infrastructure anasa khazüka yok, ta Kiper-i Brehostibarnep ashi.

Bodhbar nikongdang northeastern Kharkiv nung missile ka khaloktsüba nung tetsür ana aser arishi küm 14 tain tetsür ka asü, ta Governor Oleg Sinogubov-i Telegram nung ashi aser tekumzüker temi ki o jen teraksa mürekba noksa

tema lemsatapa liasü.

Brehostibarnepa Kharkiv tesem balala nung amak aser drone kati nisung ka yirutsü aser Russian S-300 system nungi energy infrastructure nung tenük yoker missile ka khaloktsü, ta paisa ashi.

Kharkiv nung missiles 10 dak tema khaloktsü aser nisung 200,000 dak tema power mali timtemer.

Kharkiv ya kasa tenüing nung aliba region ka indang yimtiba lir, koba Russia den arütsü nungi kilometre 30 dang pilar lir aser Moscow-i February 2022 nungi amak

tenzüka sülen mapang shia bomb pokloksür.

Ukraine yimtiba Kyiv, Zaporizhzhia aser Lviv nunga ki o jen nung tenük yoker amak saka asü-amaba mali ta ashir.

Russian missiles aser Shahed drones temi Ukraine kisüing masü saka asen tembar linüktemi renema aliba nung maneni makra, ibaji kiralongra mapa inyaksü alibai license agütsüba ama alitsü, ta Zelensky-i ashi.

Bodhbar aonung Russia-i missile 40 dak tema aser drones 40 shi Ukraine nung khaloktsü.

Paris Olympics: Track & field nung gold angur nem USD 50,000, agütsütsü



Rongchii/April 11, 2024 (Agencies): Taküm mezüngbuba Paris Games nung athletics asaya 48 nung gold medal angurtem nem World Athletics-i senpet USD 50,000 agütsütsü aser iba ajanga 2028 Los Angeles nung medal angur asemprongla nem senpet agütsütsü atema lenmang sadema lapoktsütsü.

Iba asayamung nung India nunger asayar Neeraj Chopra-ia takok angutsü imlar, shibai Tokyo Games nung javlin asaya nung gold medal ngua liasü. Pa ya India nunger track and field

asayar rongnung gold medal anguba mezüngbuba asayar lir. Bodhbarnü iba osang sangdongba sülen World Athletics (WA) ya Olympics games ka nung senpet agütsüba mezüngbuba international federation akümtsü.

"World Athletics ya Olympics Games ka nung senpet agütsüba mezüngbuba international federation akümtsü," ta WA-i sangdong ka ajanga metetdaksü.

World Athletics Tir Sebastian Coe-i ashiba agi, Olympics nung gold medal

angurtem nem senpet agütsütsü atema telemtetba agiba ya iba international lokti tentet aser athletic asaya atema kanga tongtibang mapang ka lir.

"International Olympic Committee indang revenue share koba World Athletics-i küm pezü nung khen agizüker iba nungi senpet USD million 2.4 agizüksü. Iba ya Paris nung athletics asaya 48 nung gold medal angur shia nem USD 50,000 (lakh 41) agütsütsü atema amshitsü," ta WA-i ashi.

"World Athletics-i iba jenjang agiba nung LA 2028 Olympic Games nungbo Olympic silver aser bronze medal angurtem nema senpet agütsütsü atema temulungtetba aliba densema lir," ta kasa sangdong ajanga metetdaksü. Relay team tem nema kasa senpet agütsütsü aser iba nungi parnok lemdanga agitsü.

2028 Los Angeles Olympics bonus atema format aser structure mapangtong nung sangdongtsü.

Coe-i ashiba agi, iba jenjang agiba ajanga asayartem ajungkettsü aser parnoki Olympic Games takok asoshi tongtibang shilem agiba atema tetushi agütsütsü asoshi WA bendang agütsür aliba sayur.

Nadal Barcelona Open nung asayatsü tebilemba lir



Rongchii/April 11, 2024 (Agencies): Rafael Nadal shiba yiruba ajanga masayateti arudar, pai pa taruba hopta nungi tenzüka asayatsü aliba Barcelona Open nungi asaya tenzükshitsü imla ataba Bodhbarnü lemsatepogo.

"Asayamung metenzük tsüingda idaki arua asayatetsü timla nung mezüngbuba training agir. Ni asayatetsü masayatetsü tendangtsü atema indaki arua lir aser asayatsü tejangraba lir," ta Nadal-i pa court tezülen racket bener aliba noksa ka den iba olen social media ajanga lemsatep.

Paisa, "ni asayatetsü imla atar saka ni asayatsü tabo tejangja shia matatetter," ta shisem.

Arishi küm 37 tain asayar ya taoba Brehostibarnü Monte Carlo Masters nungi atsüingina liasü, kechiyong pa clay court season tenzükba mezüngbuba asayamung nung shilem agütsüsa temang anema maliasü.

French Open 14ben koker aliba asayar ya yiruba ajanga 2023 küm asayamung timba

nung shilem magitet aser taküma Brisbane International nung dang asayar lir, kong pa quarter-final nung Jordan Thompson-i tsükdaktsüba asaya nung hip yirushia liasü.

Iba ajanga pa Australian Open den Doha aser Indian Wells nunga masayatetsüsa aküm. Mezüngbuba pa Indian Wells nunga asayanüa liasü.

Brisbane sülen pa March ita Las Vegas nung Carlos Alcaraz den exhibition asaya ka nung dang shilem agia liasü.

Bodhbarnü official Barcelona Open account-i social media nung video ka lemsatepogo, kong iba asayamung 12 ben koker alisang Nadal centre court nung ball zükshiba nguogo.

Kasa mapang nung külem Spain nunger asayar Alcaraz-a yiruba ajanga Mongolbarnü Monte Carlo nung masayatsü atema telemtetba agi aser pa taruba hopta Barcelona Open nunga asayatsü masayatsü mejangjai kümogo.

Barcelona Open ya April 15 2023 küm asayamung timba nungi 21 nü tashi asayatsü.

Mumbai Indians Vishnu melena Harvik Desai shimogo



Harvik Desai

Vishnu Vinod

New Delhi, Rongchii/April 11 (Agencies): Mumbai Indians-i Brehostibarnü Saurashtra wicketkeeper-batter Harvik Desai den tenangzüktepba ka yangluba sangdongogo.

Vishnu Vinod, shiba teka yiruba ajanga tang asaya aliba IPL nung masayateti lir, pa melena wicketkeeper-batter Harvik Desai ya shimogo.

MI den tenangzüktepba ka yangluba sülen arishi küm 24 tain asayar ya tang mezüngbuba Indian Premier league nung asayatsü.

Desai ya kanga asayar

tsenbo masü aser pa Saurashtra nung T20 asaya 27, 40 List A aser 46 First-Class games asayatokogo.

"Mumbai Indians-i Vishnu Vinod melena Harvik Desai squad nung adentsü ta sangdongogo," ta IPL media sangdong ka ajanga metetdaksü.

Arishi küm 30 tain Vishnu, shiba domestic cricket nung Kerala team nungi asayar pa teka tabelen yiruba ajanga IPL nung masayatetsüsa kümogo.

Taküm IPL nung Mumbai pur kanga junga asaya metenzüktet aser parnok tang

points table nung tibuba nungang lir.

Captain tassenba Hardik Pandya lenisüba nung Mumbai team-i tang tashi nung asaya pezü asayaba nung asem nung tamakok nguogo aser parnoki asaya ka danga koka lir.

Kasa mapang nung captain mapa Hardik nem agütsüba dak sendakba nung olulu ken o aika temai adoker jembia arudar aser osang ajanga ashiba agi, taoba captain Rohit Sharma-i taküm IPL tembangba sülenbo club toktsütsü tebilemba lir.

Billie Jean King Cup: India tetsür team-i 2-1 agi Chinese Taipei kokogo

Rongchii/April 11, 2024 (Agencies): Changsha, China nung Brehostibarnü Billie Jean King Cup Asia-Oceania Group-I asaya nung India tetsür team nungi Rutuja Bhosale-i kija asaya aser Prarthana Thombare aser Ankita Raina nati tarep asaya akokba sülen India team-i 2-1 agi Chinese Taipei team kokogo.

India team Pool A nung tasembuba jenjang nung lir. Parnoki asaya asem nung ana kokogo aser ka mekoki lir.

China aser South Korea na tang mezüngbuba aser tanabuba jenjang nung lir. Team anaprongla yagi tang tashi nung asaya asemsem koker lir.

Brehostibarnü Bhosale-i 6-3 6-2 agi straight sets nung Hao-Ching Chan ako, ajisüaka tanabuba kija asaya nung Raina, 6-2 4-6 4-6 agi En Shuo Liang-i koka liasü.

Moon Island Clay Park nung tarep asaya nung Thombare aser Raina nati 4-6 6-1 (15-13) agi Chinese Taipei team akokba sülen India team-i asaya koka liasü.

Bodhbarnü China team India asoshi kanga tashi tait liasü aser parnoki asaya 3-0 agi koka liasü. Ajisüaka iba asayamung league phase mezüngbuba asaya nung India team-i Pacific Oceania 3-0 agi koka lir.

Asia/Oceania Group I tetoktepba nung team trok nungi temaba jenjang nung tembangba team ana play-offs-i aitsü aser bonglang nung tembangba team ana 2025 küm Group II-i relegate asütsü.

Tang Chinese Taipei aser Pacific Oceania na bonglang nung lir. Team ana yagi asaya asemsem asayaba sülen kaka danga koka mali.

BILEMDANGANG
"Anema alitsüba dak alaka tanga kecha jangradem mali."